

Il detectiv scharmant turna

DAD ANDREA LUZIUS RASSEL

■ **La Gronda Britannia è ina da las terras ch'exporta ils pli blers formats da televisiun e d'istorgias litteraras. Formats sco «The Antiques Road Show» near las istorgias da «Sherlock Holmes», dad «Emma» e da «Downton Abbey», ch'èn da vasair sin tut ils channels, dattan perditga.** Mo da temp en temp ma dumond jau: Pertge stuess jau cuntinuar da leger e da guardar istorgias davart la classa sociala superiura, la «upper class» da la Gronda Britannia? Nus pudain senz'auter constatar ch'els eran parasits engurds ch'engrossivan lur possess da furs e lur facultad cun sfruttar la preda che las bartgas impurtavan da l'imperi colonial da la Britannia.

Cura ch'ina collega m'ha dacurt infurmà en tuns in tec indegnus ch'ella vesia la seria «Downton Abbey» sco ina parabra exemplarica dal snobbissem englais, che stuess bainbaud esser surpassà, hai jau dà dal chau ed hai alura tuttina guardà las repetiziuns sin il segund chanal.

Uschia èsi era cun las istorgias da Charles Lennox, il detectiv-gentleman en ils romans criminals da l'American Charles Finch. Jau ma sent in pau tschiffa sche auters vesan che jau ils leg – e tuttina cumpr'jau il nov tom uschè spert ch'el è cumpari.

Charles Lennox fa part da la classa sociala superiura dal temp da regina Victoria (ins na sa betg pli precis: Victoria è stada regina in fitg lung temp; davent dals 20 da zercladur 1837 enfin sia mort ils 22 da schaner 1901), el è in gentleman che sclerischa cas criminals. El na fa quai betg per motivs finanzials – el è gia ritg; quai è sia passiuin che vegn sparunada d'in'aversiun per la lungurela dals ritgs e d'in intellect extraordinari. Sco exemplar da sia classa ha el gugent ses chavals, ses chauns e sia famiglia, ma el è tuttina in pau sceptic dal sistem da classes en la Gronda Britannia. Ses scepticissem sa mussa per exempel cura ch'el gida ses butler da bandunar sia professiuin e sia posiziun sociala cun daventar secretari persunal d'in parlamentari e pli tard en

l'istorgia perfin da daventar sez in tal «member of Parliament». Natiralmain en la chombra gronda, la «House of Commons», la cuntrapaisa democratica a la «House of Lords», la segunda chombra parlamentara da la Gronda Britannia.

En englais è gist cumpari il novavel tom da las aventuras da Charles Lennox. El sa numna «Home by Nightfall». Lennox gida ses frar Edmund da sa restabilir suenter la mort da sia dunna charezzada. Il detectiv viagia a Sussex per visitar ses frar en la chasa da lur antenats. Jau stos conceder che be gia quella chasa gronda avrva per mai entirs cudeschs cun massa istorgias, saja quai Manderley (Daphne du Maurier), Pemberley (Jane Austen) u lura puspè Downton Abbey (Julian Fellowes of West Stafford, commember da la House of Lords). Charles Lennox vegn implitgà en in misteri stgir en las hallas venerablas dal dachasa da ses perdavants. Ma er a Londra, nua che Lennox stat, sa

sviluppa cun ina giada in misteri davart in pianist da la Germania ch'è sparì. Ils dus plots da la narraziun èn natiralmain colliads in cun l'auter. Ed uschia sun jau captivà da l'istorgia e leg il cudesch en ina giada.

Charles Finch è in autur che construescha ses plots cun premura e fa retschertgas da rudien – be gia sias descripziuns dal mund dal temp da regina Victoria tanschessan per far cumprar ses cudeschs. El guarda enavos sin quest temp cun eglis analitics, ma era bainvulents. Sche vus essas – sco jau – arsenatds da bunas istorgias da misteris, guardais da scappar per in per uras dal 21avel tschientaner, guardai en las curunas da librarias e bibliotecas per ils cudeschs da quest autur elegant e ses protagonist charmant.

Il novissim cudesch en englais è cumpari tar St. Martin's Monotaur. Charles Finch: Home by Nightfall.

Il davos cudesch en tudestg è cumpari tar Bas-tei Lübbe. Charles Finch: September Society, Der Club der tödlichen Gentleman.